

## RAAR JIBWE JISŌS IM EKAJET E

Köttōpar ko an katak in:

- Kwaļok bwe Jisōs ej Anij.
- Kwaļok bwe aolep naan ilo Kallimur Mokta kōn Ri Lomqor eo re jejjet ilo Jisōs.
- Kwaļok wāween an Jisōs kar eñtaan kōn kōj.
- Kwaļok ļomņak ko an ri utiej ro an kabuñ an ri Ju.

Meļeļe ko reļap ilo katak in:

- Jen lo bwe Jisōs ear Anij kab armej.
- Jen lo bwe eļap an Jisōs kar eñtaan kōn kōj.
- Jen lo ta eo Jisōs ear kōmņane ke armej raar kinaakļok E im kōkkure.
- Jen lo bwe mej an Jisōs wōt e maroñ ļomqoren kōj.


Jet iien jej roñ bwe emōj jibwe im kalbuuj juon armej kōnke raar ļomņak ear kōmņan juon nana, ak ilo mool e jab e eo. Je būromōj kōn juon armej me raar kajeik e, ak ejjelok ruōn. Emōj ke an juon armej ņa ruōm kōn juon men kwaar jab kōmņane? Ear kōjkan aņ ļomņak kake?

Ak emōj ke an waļok bwe ear wor ruōm, ak raar liaakļok bar juon armej, im armej eo juon ear bōk jikōm ilo ekajet im kaje? Āindein Jisōs, bwe Ear eñtaan kōn ruōd.

### 1. Jisōs ilo Getsemani.



*Mark 14:32-36 Im rej itok ñan ijo jikin etan Getsemane; im E ba ñan ro rū kaļoran, “Komwin jijet ijin ilo iien Aō jar.” [33] Im Ej aņin Piter im Jemes im Jon Ippān, im jino An kanooj bwilōñ, im eļap An eddo būruon; [34] Im E ba ñan erjil, “Aō e kanooj būromōj āinwōt ñan mej; komwin pād ijin im ekil.” [35] Im Ej ilok jidik, im buñ ioon laļ, im jar, bwe eļañņe e maroñ, awa in en ilok jān E. [36] Im E ba, “Abba, Jema, Kwō maroñe men otemjej; Kwōn bōkļok kab in jān Eō; a en jab ankil Aō, a ankil Aņ.”*



Meñe Jisōs Anij, E armej barāinwōt.

- E pen ñan E kōnke Ear jeļā eñtaan ko Enaaj iiooni mōttan jidik.
- Ear jeļā bwe Enaaj aikuj eñtaan eļap jān jabdewōt bar juon armej bwe En erom ad Ri Lomqor.




*Mark 14:37-42 Im Ej itok im lo aer kiki, im Ej ba ñan Piter, “Saimōn, kwōj kiki ke? Kwō jab maroñ in ekil iumwin juon awa ke? [38] Komwin ekil im jar, bwe komwin jab deļoñ ilowaan kapo. An e kōņaan, a kanniōk e mōjņo.” [39] Im Ej bar ilok, im jar, im bar ba naan ko. [40] Im ke Ej jepļaak, Ej lo aer bar kiki, bwe eddo mejeir, im re jaje ta eo ren uwaak E. [41] Im Ej itok alen kein ka jilu im ba ñan er, “Komwin kiki wōt kiiō, im kak-*

*kijeik kom; emōj; awa e moottok; lo, ketake Nejin armej ñan lowaan pein ro ri jerowiwi. [42] Komwin jerkak, jen etal; lo eo ej ketak Eō epaak.”*

## 2. Judas ear ketak Jisōs, im ri tariṇae ro raar jibwe.



*Mark 14:43-46 Im e mōkaj, ke Ej kōnono, Judas, juon iaan joñoul im ruo, ej itok, im elōñ armej ippān, ewor jāje im doon ippāer, jān ippān pris ro reḷap, im skraib ro, im elder ro an armej raṇ. [44] Im eo ej ketak E, e kar leḷok ñan er kakōḷlan im ba, “Eo I naaj mejenmaike, E eo; komwin jibwe E im āñinḷok im dāpij E.” [45] Im ke ej itok, e mōkaj an ilok ñan Ippān im ba, “Rabbai!” im ej mejenmaik E. [46] Im re kōteḷḷok peir im jibwe.*



Judas im ro jet raar jab kile men in, ak Setan ear tōl er ilo men ko raar kōmḡmani. Jisōs ear jeḷā bwe emōj kwaḷok kōn men kein ilo Kallimur Mokta.



*Mark 14:47-49 Im juon iaan ro rej jutak ijo, ej nōōre jāje eo an, im jepak ri karijeran pris eo eḷap, im bukwe lojilñin. [48] Im Jisōs e uwaak im ba ñan er, “Komij itok āinwōt ñae ri kowadoñ ke, kōn jāje ko im doon ko bwe komwin jibwe Eō? [49] Raan otemjej I ar pād ippemi ilowaan tempel, im katakin, im kom ar jab jibwe Eō; a eñin bwe en kaḡool naan in Jeje ko.”*

## 3. Rū kaḷor ro raar ko.



*Mark 14:50-52 Im er otemjej rej ilok jān E, im ko. [51] Im juon likao ej ḷoor e, nuknuk linen ej kōpool ānbwinnen e keelwaan; im rej jibwe, [52] A ej likūt nuknuk linen eo, im keelwaan e ko jān er.*

Ro rū kaḷoran Jisōs raar ilok jān E im ko, āinwōt An kar ba bwe renaaj kōmḡmane. Raar mijak im pok. Raar tōmak bwe Jisōs ear Ri Lomḡor eo, bōtab raar jab meḷeḷe wāween An naaj lomḡoren armej eḷaññe ro me raar kōjdat E renaaj ḡan E. Raar jab meḷeḷe wāween bwe mej eo An en lomḡoren er jān Setan, jerowiwi, im mej.

## 4. Ri tōl ro an ri Ju raar ekajete Jisōs.



*Mark 14:53,54 Im rej āñinḷok Jisōs ñan ippān pris ḷapḷap; im pris otemjej re ḷap, im elder ro, im skraib ro raar kweilokḷok ñan ippān. Im Piter e kar ḷoor E, im etoane, ñan lowaan ḡweo imōn pris ḷapḷap; im ej jijet ippān ro ri kabōjrak, im ej rañrañ ilo kijeek.*

Piter ear ḷoore Jisōs jān ettoḷok, bwe ear mijak ñe ab ren bar jibwe e.



*Mark 14:55 Im pris ro reḷap im ri pepe otemjej rej kappok kōnnaan ñae Jisōs, bwe ren ḡan E, im ejjeḷok aer loe.*

Jisōs ear jutak imaan jikin ekajet an ro ri Ju. Ejjeļok nana Jisōs ear kōmmane, im kōn men in, raar jab maroñ lo wāween aer naaj liaakļok E. Etke raar dike Jisōs? Jisōs ear kōmman emman wōt ñan er im aolep. Bōtab, raar jab kōnaan oktak jān iaļ ko aer re nana. Āindein kōj armej. Emman ipped iaļ ko ad re nana. Jej yokwe marok eļap jān meram, im kōn men in, je jab kōnaan oktak jān nana ko ad im ļoor Jisōs.



*Mark 14:56-59 Bwe elōñ rej riab ñae E, a e jab āinwōt juon aer in naan. [57] Im jet re jutak, im riab ñae E im ba, [58] “Kōm ar roñ An ba, ‘I naaj rupe tempel in kōmmane kōn pā ko, im iumwin jilu raan I naaj kalōk bar juon, im jab kōmmane kōn pā ko.’” [59] A e jab āinwōt juon aer in naan.*

Men ko Anij ear ba renaaj waļok ñan Jisōs raar waļok. E jejjet aolep naan ko an ri kanaan ro kōnke Jetōb Kwōjarjar ear tōl er ke raar jeje.



*Sam 27:12 Kwōn jab ketak eō ñan ankil an ro rej kōjdat eō, bwe ro ri kōnnaan riab raar jutak ñae eō, im ro re kōnaan kōkkure.*

David ear je naan kein 1,000 iiō mokta ļok, im kiiō re tōprak.



*Mark 14:60-62 Im pris ļapļap ej jutak eoļap, im kajjitōk ippān Jisōs im ba, “Kwō jab uwaak ñan jidik ke? Ta eo rein rej kōnnaan ñae Eok?” [61] A Ej kejakļokjeņ im jab uwaak. Pris ļapļap eo ej bar kajjitōk Ippān im ba ñan E, “Kwe ri Kraist ke, Nejin Eo E mōñmōñ?” [62] Im Jisōs e ba, “Ña E; im kwō naaj lo Nejin armej Ej jijet i anmoonōn kajoor, im itok ilo kōdō ko i lañ.”*

Ke raar riab kōn E, Jisōs ear ikōñ wōt. Ear lōke Jemān bwe en tōprak ankil An. Ear jeļā bwe Enaaj aikuj in mej bwe En ļomōoren armej jān Setan, jerōwiwi, im mej. Ak ke raar kajjitōk ippān Jisōs eļañņe E ri Kraist ke jab, Ear uwaak im alikkar im ba aet.

Kwōj kememej ke āt eo im Jeova Anij ear leļok ñan Moses ilo Exodus 3? Anij ear ba bwe etan, “Ña E.” Jisōs ear kajerbal ejja āt eo wōt kōn E make, im ear bar kajerbale ilo Jon 18:6. Ri tōl ro an ri Ju raar jeļā kōn etan Anij, im raar meļeļe bwe Jisōs ear ba ñan er bwe E Anij.

Ke Jisōs ear itok ñan laļ in, Ear itok bwe En Ri Lomōor eo. Ñe Ej bar itok, enaaj bwe En ekajete armej. Ilo naaj iien eo, aolep renaaj lo An utiej im iturin Jemān, im enaaj alikkar bwe E Anij, joñan wōt Jemān.



*Mark 14:63,64 Innām pris ļapļap eo ej kekōl nuknuk ko an im ba, “Etke jej aikuj bar jet ri kōnnaan? Koņ ar roñjake blaspim eo. Ta ami ļōmņak?” Im er otemjej rej liaakļok E, bwe ewor ruōn bwe En mej.*

Raar kekōl nuknuk ko aer kōnke eļap aer illu. Pris ļapļap eo ear illu kōnke ear roñ an Jisōs ba bwe E Anij.



*Mark 14:65 Im jet rej jino aer kaplouk E, im pinej mejān, im baiti E, im ba ñan E, “Kwōn rūkaanij!” Im ri kabōjrak rej ubrare kōn ļopiden peir.*



*Aiseia 50:6 Iar leļok ālikū ñan ro ri jeptak, im jepō ñan ro raar tūm kooļan kwōdeak; Iar jab ñooje turun meja jān jook im kapilo.*

## 5. Pailat ear ekajete Jisōs.




*Mark 15:1 Im e mōkaj ke e jibboñ pris ro re ļap rej pepe ippān elder ro, im skraib ro, im ri pepe otemjej, im rej liāpe Jisōs, im āñinļok im ketak E ñan Pailat.*

Ro ri Rom raar irooj ioon āneo, im raar jab kamālim ri Ju ro, ilo jikin ekajet ko aer, bwe ren man juon armej. Ri tōl ro an ro ri Ju raar āñinļok Jisōs ñan ippān Pailat, bwe raar kōjatdikdik bwe Pailat enaaj ba en mej Jisōs.



*Mark 15:2-5 Im Pailat ej kajjītōk Ippān, “Kwe kiiñ an ri Ju ro ke?” Im E uwaak im ba ñan e, “Kwōj ba.” [3] Im pris ro reļap rej kinaakļok E kōn men ko re lōñ. [4] Im Pailat ej bar kajjītōk Ippān im ba, “Ejjeļok Añ uwaak ke? Lo e nañin lōñ men ko rej jarōkļok Eok kaki!” [5] A Jisōs e jab bar uwaak ñan jidik; kōn men in Pailat e bwilōñ.*



Jisōs ear itok ilo bwij eo an Kiiñ Devid, im kōn men in, En kar Kiiñ an ri Ju ro. Aiseia ear rūkaanij im ba bwe Ri Lomōḡ eo enaaj ikōñ ke rej ekajete.



*Aiseia 53:7 Ar kōttāik E, a ke ar kaeñtaan E, Ear jab walañi loñiin; āinwōt juon lamb rej tōl ļok e ñan mej, im āinwōt juon sip ej ikōñ imaan ro ri mwijbare, āindein Ear jab walañi loñiin.*

Aolep men ko Anij ej ba rej waļok.

## 6. Armej rej kāālōt Barabbas im jab Jisōs.



*Mark 15:6-11 A ilo kwōjkwōj eo ej kōtļok ñan er juon ri kalbuuj, jabdewōt eo re kōñaan. [7] Im juon etan Barabbas, eñōj liāpe ippān ro raar kapata, er armej raar uror ilo aer kapata. [8] Im jar eo ej wanlōñļok im jino aer kajjītōk ippān, bwe en kōmman ñan er āinwōt ej kōmman ien otemjej. [9] A Pailat ej uwaak er im ba, “Koñ kōñaan bwe in kōtļok ñan koñ kiiñ an ri Ju ro ke?” [10] Bwe ej kile pris ro reļap, raar ketak E kōn aer ebbanban. [11] A pris ro reļap rej kareel būruon armej rañ, bwe en kōtļok Barabbas ñan er.*

Pailat ear jeļā bwe ejjeļok ruōn Jisōs im bwe unin an ri Ju ro kinaakļok Jisōs ej kōn aer ebbanban. Pailat ear kōjatdikdik bwe armej ro renaaj kāālōt Jisōs bwe en kōtļok E im jab Barabbas, juon ri nana eļap.

## 7. Ri tōl ro an ri Ju raar kōñaan bwe Jisōs en mej ioon juon debwāil.



*Mark 15:12-14 Im Pailat e bar uwaak im ba ñan er, “Innām ta eo koñij kōñaan bwe in*

*kōmman ñan Eo kom ba, 'E kiiñ an ri Ju ro'?' [13] Im rej bar laṃōj, "Kwōn debwāāl E!" [14] Innām Pailat ej ba ñan er, "Bōta? Ta eo e nana E ar kōmmane?" Im rej kanooj kaḷapḷok aer laṃōj, "Debwāāl E!"*

Mej ioon debwāāl ear juon wāween e nana in mej. Ekkā wōt, ear jab ṃokaj an armej eo mej. Ear toto im eñtaan iuṃwin elōñ awa ṃokta jān an jako. Ke kien ear kōṇaan ṃan ro ri nana, elōñ wāween aer ṃan er, ak mej ioon debwāāl ear wāween e nana tata. E mo bwe jabdewōt citizen in Rom en mej ioon debwāāl.

Aolep naan ko ilo Kallimur Mokta raar jejjet kōn Jisōs. Anij ear ba ilo Aiseia bwe ri Ju ro renaaj dike Jisōs meñe ejjeḷok un.



*Aiseia 53:3 Armej raar kajekdoṃon im joḷok E; E juon armej in būromōj, im Ear jeḷā liaajḷoḷ; ar kajekdoṃon E āinwōt juon armej rej pinej mejeir jān E; im kōj jaar jab kaorōk E.*



*Mark 15:10 Bwe ej kile pris ro reḷap, raar ketak E kōn aer ebbanban.*

## 8. Raar deñōte Jisōs im kajjirere kake E.



*Mark 15:15 Innām Pailat, kōn an kōṇaan kaaenōmmane jar eo, ej kōtḷok Barabbas ñan er, im ketak Jisōs, ke eṃōj an deñḷok E, bwe ren debwāāl E.*


Jān book in history ko, je jeḷā kōn wāween aer kar kijoñ in deñḷoke armej. Raar kōmman juon to ae-tok jān kilen kau. Raar lukwōj jet ṃōttan di im māāl me rekkañ ilo to eo. Raar lukwōj armej eo ñan juon joor bwe en jab maroñ ko. Raar wutik an nuknuk im deñōte bwijen katen, im men ko rekkañ raar ṃwijiti kilen im kanniōken. Jet iien, armej raar mej jān deñdeñ rot in. Jisōs ear jeḷā bwe men in enaaj waḷok, ak Ear make kōttāik E im bōke bwe En eñtaan ilo jikōm im ilo jikū.



*Mark 15:16-19 Im ri tariṇae rej āñinḷok E ñan lowaan jikin eo etan Pritoriōm, im rej kokweiloktok jar an tariṇae otemjej. [17] Im rej kanuknuk E kōn nuknuk e būrōrō, im pirōk pāllin kālōklōk, im likūt e ioon bōran; [18] Im jino aer yokyokwe, "Yokwe Eok, Kiiñ an ri Ju ro!" [19] Im rej deñḷok bōran kōn koba, im kaplouk E, im rej bukweḷōḷo im kabuñ ñan E.*

Ālikin aer kar deñḷoke Jisōs, ri tariṇae ro raar kajjirere kake E. Raar kanuknuk E kōn juon nuknuk e būrōrō kōnke men in color an kiiñ ro ilo kar tōr eo.

Raar kōmman juon kūrawōn jān kālōklōk ko im likūte ioon bōran. Ke Anij ear kwaḷok lia ko ñan Adam im Iv, Anij ear ba bwe enaaj wor kālōklōk ko. Jisōs ear itok im mej kōn kōj bwe En ḷomṃoren kōj jān lia eo an jerōwiwi. Ear mej kōn jerōwiwi ko an laḷ in.



Ri Ju ro raar kinaakḷok Jisōs meñe ejjeḷok An bōd. Raar ekajete ilo boñ, im raar eṃroñ jet armej me raar riab kōn Jisōs. Pailat ear ekajet im liaakḷok Jisōs meñe ear jeḷā bwe ejjeḷok An bōd. Juon ri nana,

Barabbas, ear mour, ak Jisōs, rū wānōk, ear mej.



*1 Piter 3:18 Bwe Kraist barāinwōt Ear eñtaan kōn jerōwiwi juon wōt alen, Rū Wānōk kōn ro re jab wānōk, bwe En karuwaaklōk kōj ñan Anij; im raar urōt E ilo kanniōk, a eṃōj kemour E ilo jetōb.*

---

Kajjitōk ko

1. Jisōs ej Anij. Innām etke ear pen ñan E bwe En iioon men ko re pen ilo jemlōken An mour?
2. Wōn ear ketak Jisōs?
3. Wōn ear tōl Judas im ro jet bwe ren jibwe, ekajet, im ṃan Jisōs?
4. Elōñ ke an Jisōs bōd?
5. Jisōs ear ba ta ñan Pailat ke armej raar riab kōn E?
6. Wōn eo im Pailat ear kōtłok e bwe en anemkwōj?
7. Ekkar ñan Pailat, etke ri Ju ro raar kōṃaan bwe en mej Jisōs?
8. Ri tariṃae ro raar kōṃṃan ta ñan Jisōs?
9. Kurawōn in kālōklōk ko ej kakememej kōj kōn ta?
10. Etke Jisōs ear likūt bwe ren ṃan E im En mej iioon debwāal?